



Broj:01-1-3790/12  
Sarajevo, 13.12.2012. godine

## MEDIJIMA

***Predmet : Saopćenje za javnost***

### ***Rezultati poslovanja lizing sektora u Federaciji BiH u trećem kvartalu 2012.godine***

Prema pokazateljima poslovanja lizing društava u Federaciji BiH sa 30.09.2012. godine može se zaključiti da je poslovanje lizing društava u periodu 01.01. do 30.09.2012. godine u Federaciji BiH sa silaznim trendom u odnosu na isti period prethodne poslovne godine.

Nepovoljna kretanja u realnom sektoru u BiH negativno su uticala i na djelatnost lizinga u Federaciji BiH, koja je tokom 2012. godine obilježena usporavanjem obima poslovanja, što je uvjetovano smanjenjem lične i investicijske potrošnje (ulaganja), te problemima u naplati potraživanja. Kod pojedinih lizing društava su još uvijek prisutne poteškoće poslovanja koje proizilaze iz naplate postojećih potraživanja koja su nastala u prethodnim periodima.

Bilansna suma sektora lizinga na dan 30.09.2012. godine iznosila je 707.488 hiljada KM, što je za 7% ili za 54.232 hiljada KM manje u odnosu na 31.12.2011. godine.

U periodu od 01.01. do 30.09.2012. godine na razini djelatnosti lizinga u Federaciji BiH kao rezultat poslovanja ostvaren je gubitak u iznosu od 21.237 hiljada KM. Pojedinačno posmatrano dobit su ostvarila četiri lizing društva u iznosu od 3.288 hiljada KM, dok su gubitak iskazala tri lizing društva u iznosu od 24.525 hiljade KM.

U lizing društvima na dan 30.09.2012. godine bilo je ukupno 163 zaposlena, što je za 6% ili 10 zaposlenika manje u odnosu na 30.06.2012. godine.

Djelatnost lizinga u Federaciji BiH bilježi smanjenje volumena poslovanja posmatrano po broju i vrijednosti novozaključenih ugovora. Vrijednost novozaključenih ugovora finansijskog i operativnog lizinga u periodu od 01.01. do 30.09.2012. godine je iznosila 158.269 hiljada KM i za 45.616 hiljada KM ili 22,37% je manja u odnosu na isti period prethodne godine. Posmatrano u istom periodu, broj novozaključenih ugovora je iznosio 4.192, što je za 15,43% manje u odnosu na isti period prethodne godine.

U strukturi ukupne aktive lizing društava najznačajnije učešće su imala neto potraživanja po osnovu finansijskog lizinga koja iznose 444.402 hiljada KM ili 62,81% od ukupne aktive sektora lizinga. Neto potraživanja po osnovu zajma su na dan 30.09.2012. godine iznosila 119.005 hiljada KM ili 16,82% od iznosa ukupne aktive sektora lizinga i ista će ostati u bilansima lizing društava dok ne isteknu ugovoreni rokovi na koje su isti odobreni.

Na dan 30.09.2012. godine nije došlo do značajnih izmjena u strukturi pasive u odnosu na prethodne izvještajne periode. Obaveze po uzetim kreditima i dalje predstavljaju dominantnu poziciju u strukturi ukupne pasive, 92% iznosa ukupne pasive.

Ukupne obaveze po kreditima na dan 30.09.2012. godine iznose 652.064 hiljada KM i smanjene su za 34.602 hiljada KM ili 5,04% u odnosu na 31.12.2011. godine.

Ukupni kapital lizing društava je na dan 30.09.2012. godine iznosio 31.931 hiljada KM. U poređenju sa 31.12.2011. godine, navedena pozicija je manja za 21.090 hiljada KM ili 39,78%, što je uzrokovano činjenicom da je lizing sektor ostvario gubitak.

Gubitak na nivou lizing sektora najvećim dijelom je posljedica nemogućnosti naplate postojećih potraživanja, kod pojedinih lizing društava, koja su nastala u prethodnim periodima kada lizing društva nisu bila pod nadzorom Agencije.

U trećem kvartalu 2012. godine Agencija je održala pojedinačne sastanke sa upravama sedam lizing društava koja posluju na teritoriji Federacije Bosne i Hercegovine. Cilj sastanaka je bio unapređenje i očuvanje stabilnog lizing sektora kao i adekvatan nadzor zakonitosti poslovanja lizing društava. Na sastancima su izložene informacije o aktualnostima u pojedinačnim lizing društvima, mogućim problemima koji utiču na razvoj finansiranja putem lizing djelatnosti, mogućnostima unapređenja pravnog okvira koji reguliše ovu oblast kao i o nadzoru koji provodi Agencija kao regulator. Dogovoreno je da će se problemi vezani za razvoj finansiranja putem lizing djelatnosti rješavati institucionalno, odnosno da će Agencija u okviru svojih nadležnosti podržati prijedlog izmjena i dopuna Zakona o lizingu kod Ministarstva finansija/financija Federacije BiH vezano za dozvoljenu djelatnost lizing društava.

URED FBA ZA INFORMIRANJE